

Doggie masih hidup lagi!

■ **Pemilik akui silap muat naik gambar kononnya bakar anjing kerana gigit kasut**

Segamat

Padah bergurau kasar dengan memuat naik di media sosial kononnya membakar anjing peliharaannya, seorang peniaga terpaksa membuat laporan polis, kelmarin bagi membuktikan ia hanya gurauan selepas teruk dikecam netizen.

Tan Chong Meng, 35, dari Labis, di sini, berkata pada jam 12 tengah hari Sabtu lalu dia mendapati kasut yang di letakkan di depan rumahnya koyak dipercayai digigit anjing peliharaannya diberi nama Doggie.

Katanya, bagi menunjukkan kononnya dia marah dengan perbuatan anjing betina berusia tiga tahun itu, Tan mengambil gambar dirinya mengurung haiwan itu di dalam sangkar dan membakarnya serta memuat naik gambar ke laman sosial Facebook.

"Sebenarnya saya tidak

menganiaya Doggie seperti yang dilihat dalam gambar kerana langsung tidak mencederakannya apatah lagi membakarnya. Itu gurauan sebab saya mahu lihat apa reaksi orang ramal.

"Tetapi saya silap kerana tidak sampai beberapa minit gambar itu di muat naik, pengguna Facebook mula mengancam dan menuduh saya kejam terhadap haiwan, malah ada yang melemparkan kata-kata kesat.

"Saya dan isteri terpaksa menjawab semua komen netizen bahawa saya hanya bergurau dan Doggie sebenarnya masih hidup, tetapi mereka tidak mempercayainya sebaliknya menuduh saya sengaja mencari helah," katanya ketika ditemui di rumahnya, di sini, semalam.

Katanya, sebenarnya gambar api itu adalah teknik fotografi dan gambar bangkai anjing yang rentung pula adalah patung anjing yang sama dengan warna Doggie.

"Saya membela Doggie sejak haiwan itu berusia tiga bulan selepas diberikan seorang rakan dan kami sekeluarga sayangkannya seperti ahli keluarga sendiri," katanya.

Katanya, dia juga memuat naik gambar Doggie yang masih hidup di media sosial itu, tetapi netizen masih menuduhnya mahu menegakkan benang basah.

"Oleh itu saya tidak ada cara lain dan datang ke Balai Polis Bandar Putra jam 6 petang semalam (kelmarin) untuk membuat laporan bahawa saya tidak melakukan perbuatan kejam itu ke atas anjing peliharaan sendiri," katanya.

Ahmad Ismail
am@hmetro.com.my



GAMBAR anjing yang dimuat naik Tan bagi menafikan perbuatannya.



PATUNG menyerupai Doggie yang dibakar.

LAPORAN polis dibuat Tan.